

## Mepepelime ma Yakubu

### *Ucuḍuwu wa aatagada a nda*

Yakubu zawa'a vu Zagbain Yesu Zamawawa ayi ḁa za na ḁanai aatagada a nda. U ḁana ta mepepelime ma nda a tyo aza e Itoni e Yesu aza na a ri ubazu baṭa baṭa aṭsuma o uvaḁi adama a aṭsumaḁima a na oo sowuso adama e itoni ya Yesu Zamawawa.

Ana aṭsumaḁima a yuwain aḁunḁa lon, reve e bete'we a tyo baṭa baṭa. Ayi ḁa i zuwai Yakubu ḁanaa nle mepepelime ma nda adama a na u ciga nle a kaḁa asuvu waru a yuwan ankuri aṭsuma e itoni i na a yuwusan. Ayi ḁa i zuwai aatagada a nda a yuwusan adanshi adama a aṭsumaḁima, na addama, na makaḁa ma asuvu, obolo na avasa, waru na nden n na mu ntsayi a yuwan aṭsuma a nden n na a yuwusan aṭsuma e itoni.

Aza e Itoni ana'an na aḁunḁa o to sowuso aṭsumaḁima e ekere a aza a na a kurusu Zamawawa shi. Suru na ne suru tsu toni niyi ulobonu. Aatagada a nda o roco tsu ta itoni ya Yesu ayi ḁa a yuwan ili i sa'ani usana suru.

### *Ili i na i ri pe aṭsuma a aatagada a nda*

1. Icaṣu (1:1)
2. Wuma wu ucawu wo okolo nu ugbozu (1:2-18)
3. Mawwa nu ukurusu wi ikaka ya Asula (1:19-27)
4. She vu roco aḁangulu a tyo aza e ikebe wan (2:1-13)

5. Ucawu wo okolo na linga (2:14-26)
6. Ugbozu ni idanshi (3:1-18)
7. Morono ma atsuva adama a tsu'utsa nu uvadi (4:1-5:6)
8. Makaɓa ma asuvu, ni isa'ani, obolo na avasa (5:7-20)

### *Ucuɗuwu*

<sup>1</sup> Amu da Yakubu, aagbashi a Asula waru aagbashi e Yesu Kristi Zagbain Zamawawa.

N ta danasaa aza e Itoni ya amayun a na a ri ubazu suru atsuma o uvadi.

N ta lyungusu icasu i va.

### *Uritosu adama a malyungwa*

<sup>2</sup> N'utsa n va suru, i yuwan mazanga mantsa ma na addama a tawa ndu icu'un icu'un.

<sup>3</sup> Adama a na i reve ta cine malyungwa mo ndolo ma tsu zuwa ucawu wo okolo a du u tawa na makaɓa ma asuvu.

<sup>4</sup> I kaɓa asuvu hali malyungwa ma du mo koto. Ana i kaɓai asuvu o ndolo i to o'wo nu ucawu wo okolo ugbamu waru i ta dana ushiwun, yaa lamba ili i sa'ani shi.

<sup>5</sup> Za na lambai ugbozu suru, u pati Asula, waru u ta ca yi ugbozu'u. Asula a tsu ca ta vuma ne'e pere. U tsu gbarana za na pati niyi ili shi.

<sup>6</sup> Amma na vu pati ili i ro, vu ciga vu 'yuwan vu ca okolo, agba vu kuda okolo wan. Ni i kuda okolo i ta dana gashi ikeɗu i mala ma na upepu u tsu zuwusa yi a kandaruwusa.

<sup>7</sup> Cu'un vuma ndolo yuwan majiyan ma na Zagbain aa yuwaan yi ili ro wan, ko ke'en.

<sup>8</sup> Cu'un vuma ndolo tsu gura yuwaan aciyayi majiyan mā tā shi, waru u tsu gura kuru ure u tā shi.

<sup>9</sup> Azā e Itoni aza a na ā ri ni ili shi, a yuwan afalu adama a na Asulā a 'yāsan le tā.

<sup>10</sup> Azā e Itoni aza a na ā ri ni ikebe, a yuwan afalu fo adama a na Asulā a zuwa le tā a kāfato aciyele. Azā e ikebe o to koto ana yipālu ya anlya i na i tsu utā o ogozo.

<sup>11</sup> Urana u tsu tāwā tā nu usudūwu wā yi, āvu u 'yeweto anlya, āvu waru yipālu yā yi i riyā e idā, reve ulobonu wā yi u koto. Ne dā waru za vu utsuru oo koto ayi pe atsumā a linga vā yi.

<sup>12</sup> Asulā ā tsu tāwāā tā ama a na a kābai asuvu na ankuri nā mālyungwā nā māzānga. Nnā mālyungwā mo koto, Asulā a ta ca ookokolo a wuma u babu ukotu e ekere a za na riyāi a mālyungwā'ā shi. Asulā a yuwaan tā aza a na a ciga niyi nzuwulai n nda.

<sup>13</sup> Nā vuma ciga yuwan ili i babu ulobonu, cu'un vuma ndolo she u damma Asulā ā lyungwā yi tā wan. Za lo na aa gura lyungwā Asulā a yuwan iwuya shi, waru Asulā ā tsu lyungwā ama a yuwan iwuya shi.

<sup>14</sup> Icigi i maluwa ma na tsaa yuwan iwuya u tsu lyungwā tsu tā tsu yuwan ili, reve u pusān tsu ana.

<sup>15</sup> Maluwa mo ndolo u tsu yuwan tā aatsumā reve u matsan unusu, ne dā waru unusu u ndolo u tsu yuwan mgbain hali u tāwāā nu ukwā.

<sup>16</sup> Ama a na n cigai ābundā, she i kuru ili ye epen wan.

<sup>17</sup> Ili i na i ri ulobonu suru une'e u dā diga ubātā wā Asulā dē zuva, ne dā waru ili suru i na i ri babu

unusu. Ili i nda suru a ca tsu ta le diga ya Dada na yuwain ekan a zuva. Ne da u ri kuci, u tsu vadala cine ululu u tsu vadala babu usan shi.

<sup>18</sup> Icigi ya yi i da tsoo o'wo ama a na u dangwai, da da u lyunguwa ntsu ikaka ya amayun, ikaka i da da i matsan ntsu tsu muwun mu ufaru.

### *Zuwai atsuvu a du*

<sup>19</sup> Ncigata n va, i dana na mawwa babu usan, amma i yuwan adanshi go'o wan, waru i yuwan upan go'o wan.

<sup>20</sup> Ni i yuwan upan, ko ili i sa'ani i ta i na Asula a ciga ndu i yuwan, yaa yuwan shi.

<sup>21</sup> I lyawa tsipere ni iwuya. Waru i kambato aciyadu ili i ro i da shi, waru i usu ikaka i na a shuwai atsuma a du, ikaka'a i ta nu ucira u na waa wawa du.

<sup>22</sup> I yuwan ili i na ikaka'a i damma ndu, she yu uwwa na atsuvu a du goon wan, ni i yuwan ne, i yuwaan ta aciyadu tsulo.

<sup>23</sup> Na vuma uwwa adanshi a Asula agba u yuwan ili i na u damma niyi shi, cu'un vuma ndolo ta gashi vuma na kalyuwai aciyayi a madubi.

<sup>24</sup> Reve nu u kara avu wi icina cine u ri babu usan.

<sup>25</sup> Agba na vuma kalyuwa wila wa Asula u na u ri ulobonu lon, reve u lyuwa elime a yuwusan ili i na wila'a u dammai, vuma ndolo ta tsura aba'un na asuvu nden a na wila u cayi.

<sup>26</sup> Na vuma aa yuwusan majiyan gashi u to tonishi Asula, agba u gura guza unu wa yi shi, wu lumu ta aciyayi, waru itoni ya Asula ya yi pere da.

<sup>27</sup> Ure u sa'ani u na wu ntsayi o toni Asulā Dada tsu ayi da a kalyuwa mkpa'an na nruna, reve waru a suma nshinda mu uvadi.

## 2

### *Morono ma atsuvu adama a adangulu*

<sup>1</sup> Ama a va, Yesu Zagbain Zamawawa tsu ta na tsugbain lon. Adama a na adu aza e Itoni a da, she i roco adangulu e ekere a ama o ro wan.

<sup>2</sup> Iroci, na vuma ro uta de reve u tawa ubata wi ibolo i du, ayi wotowu ni itana i sa'ani na makawani me ikebe ma zinariya, reve waru za vu ulambu tawa wotowu ni itana yu uwuyanuwukaru.

<sup>3</sup> Reve vu la'a ca ugbozu wa wu a za na otoyitana i sa'ani, reve vu damma yi, “Yuwan ankuri danu o ootogu a sa'ani a nda.” Reve vu damma za vu ulambu, “Isawan ndede,” ko vu damma yi, “Danu e ida lo a makakan ma va.”

<sup>4</sup> Na vu yuwan ne, vu ta yuwusan adangulu atumā a ama, waru ne da yaa yuwusan gashi aza o uge'etosu a na a ri na majiyan me iwuya.

<sup>5</sup> Ncigata n va, zuwai atsuvu a du yu uwwa ulobonu: Amayun a da Asulā a dangwai aza o ulambu atumā o uvadi u nda, reve o o'wo aza o utsuru atumā e Itoni. Reve waru u dangwa le tsara a uwa atumā o tsugono tsa na u yuwayin aza a na a ciga niyi nzuwulai.

<sup>6</sup> Na ne suru, i tsi isulusa ta alambi! Waru gba aza o utsuru ele da e le'eshe du, reve waru a tara du a tyo o ukobu wu uge'etosu.

<sup>7</sup> Ele dāda waru aza a na aa yuwusan adanshi a vanvama adama a ala a sa'ani e Yesu Zamawawa, waru i ta pe atsuma a ala'a.

<sup>8</sup> Ili i na yi ntsayi ayi da i toni wila u Mogono'o u na a tsurai atsuma a Adanshi a Asula, “Vu ciga nron mu nden ma wu, cine vu cigai aciyawu.”

<sup>9</sup> Na vu tara ama cine vee eneshe le ne esu, vu nusan ta, waru Wila u kototo wu ta, vo o'wo ta za vu unusu.

<sup>10</sup> Na vuma toni Wila wa Asula suru, avu u riyā a za ta, vuma ndolo kuḍa ta o toni wila'a suru waru u yuwan ta unusu.

<sup>11</sup> Asula a na a dammai, “She vu yuwan tsipere wan,” ayi da waru u dammai, “She vu una vuma wan.” Na vu yuwan tsipere shi, avu vu una za ro, vo o'wo ta za makuda ma Wila wa Asula suru.

<sup>12</sup> Adama o ndolo vu yuwan adanshi, waru vu yuwan ili i na gashi gogogo da e ge'eto wu na wila u na waa ca wu ufaḷu.

<sup>13</sup> Na vee inda iliyali yo ozo o ro shi, ee ene iliyali ya wu shi. Na voo rocosu ozo o ro isa'ani, to, o to roco wu isa'ani ya Asula hali isa'ani'i i lyuwa aci o uge'etosu.

### *Ucawu wo okolo na mayan mo ulinga*

<sup>14</sup> Ama a va, nye i da isa'ani, vu damma, vu ta nu ucawu wo okolo, agba vu roco yi na linga shi? Cu'un vu ucawu wo okolo o ndolo aa wawa za shi.

<sup>15</sup> A damma, ve ene ta vuma na cigai ilyalya ko itana yu u'otosu,

<sup>16</sup> reve vu damma, “Vu rawa lafiya, Asula a ca wu malyuwaa na mosowoo ni itana yu u'otosu,” agba vu kamba yi atsuma e ili i na yaḡa baḷa yi shi.

17 Nā ne ɗa ucawu wo okolo a wu a ri goon, babu ulinga u na u rocoi, ucawu wo okolo o ndolo pere ɗa, waru aakwaƙwa a ɗa.

18 Za ro ta gura ece mu, “Vu ta nu ucawu wo okolo?”

Waru n ta usu yi, “N ta ni ili i na moo roco.” Reve n damma yi, “Roco mu vu ta nu ucawu wo okolo, agba vaa yuwusan isa'ani shi, waru amu n to roco wu n ta nu ucawu wo okolo atsuma o ulinga u na maa yuwusan.”

19 Vu usu ta na Asula a ta a ɗa. U lobono ta. Ko otoni a lima fo a usu ta ne ɗa, u tsu zuwa le ta e je'en na wovon.

20 Avu ulo u vuma! Vu ciga ta she nanza roco wu ucawu wo okolo babu ulinga u sa'ani pere ɗa?

21 Uwwai nda, akaya a tsu Ibrahim zuwa ta Asula a uwwa uyo'o ana u votoyin ulobo wa yi Ishiyaku a masa'a, tsara u yuwan kucci na ayi.

22 Gogo vu ta gura ene cine ucawu wo okolo a Ibrahim ni ili i na u yuwusain a lingai obolo. U roco ta ucawu wo okolo a yi amayun a ɗa atsuma e ili i na u yuwain.

23 Apa nda ili i na Adanshi a Asula a dammai, “Ibrahim ta nu ucawu wo okolo e ekere a Asula, reve waru Asula e kece yi atsuma a aza a abula.” Ne ɗa Ibrahim yuwain ɗaɗa e de niyi i'utsa ya Asula.◇

24 Ye ene ta gogo a na tsu ta gura zuwa Asula a zangana na atsu adama e ili i na tsu yuwain, agba ni ili i na tsu usuyi goon shi.

25 Iroci, Rahapuf aashakala a ɗa a danai. Amma u zuwa ta Asula a yuwan mazanga na ayi ana u

◇ 2:23 Isha. 41:8.

ushiyi aza a na a 'yawaɪ matawa mo utyo me ida, reve u wawa le awu u kambato le o u'wa nu ure u ro.

<sup>26</sup> Lipu na ri babu ruhu, lipu ndolo akwakwa a da, ne da ucawu wo okolo a ri babu ulinga aakwakwa a da!

### 3

#### *Uritosu adama e eelentsu*

<sup>1</sup> Ama a va, she yo o'wo munlu ma Adanshi a Asula na abunda wan. I reve Asula e te ge'eto tsu lon adama a na tsu ri munlu.

<sup>2</sup> Atsu tsu nusan ta e re na abunda, amma aza a na a gura guzai elentsu e le, a ta gura guza aciyele e re na buwai.

<sup>3</sup> Tsu tsu zuwaa ta ido rumu na amunga a na tsara a uwwa tsu, tsara tsu gura zuwa le a yuwan ili i na tsu cigai a yuwan suru.

<sup>4</sup> Ne da fo a tsu yuwaan wantsun. U ta mgbain waru upepu u mala u tsu kebe yi ta. Na ne suru na zagbain yuwan ulinga na aaci o uwalata u wantsu'un u tsu vadala ta a tyo ubata u na u ciga niyi u 'yawa.

<sup>5</sup> Ne da waru eelentsu, ili i ke'en i da atsuma a lipu, agba u tsu yuwan ta abajini e ili. Abajini o una a tsu kula ta na makina me ke'en.

<sup>6</sup> Eelentsu fo akina a da. U ta tapu ni iwuya, u tsu una ta vuma suru suru, reve u zuwa ure u wuma u vuma a akina, ayi aciyayi u'wa wa akina u da we ivulusa yi.

<sup>7</sup> Ama a tsu gura ta zuwa nama suru vu uwwa le, na nnunu, ni iyo, na mugula fo,



<sup>8</sup> agba babu za na aa gura zuwa eelentsu a yi oo toni yi. Ili i wuya i na vuma aa gura gitsa da shi. U ta na yaza yu ucira.

<sup>9</sup> Ne eelentsu a da tsu yuwaan Zagbain na Dada ica. Ne eelentsu a da da waru a tsi isula ama, ko na a yuwan nle oroci a Asula.

<sup>10</sup> Ica nu unu wu usan, o unu u ta u da oo utusa, aza a va, she wo o'wo ne wan.

<sup>11</sup> Lyusumini ta ta gura tawa na mini mo uyo'o na mini mo okono?

<sup>12</sup> Aza a va, ashe ubiri u ta gura matsan zetun?† Ko zetun u matsan ubiri? O'o, ne da waru vee kene mini mo uyo'o a lyusumini ma na ma ri okono shi.

### *Cu'un vu gbozu re*

<sup>13</sup> Atsuma a du, vuma ro ta pe za na ri nu ugbozu nu urevu wi ili ya Asula? Ama a na a ri ne, o tsu rocoo ta cine aa yuwusan wuma u sa'ani u le, waru o tsu rocoo ta cine aa yuwusan ili i sa'ani babu u'yasasan wa avangaci.

<sup>14</sup> Amma na vu ri na tsushu'un ni icigi ya aci o ookolo a wu, she vu 'yasan avangaci a na vu ri nu ugbozu wan. U'yasasan wa avangaci a wu suru amayun a da vaa 'yuwusan.

<sup>15</sup> Icigi ya aciyawu, na tsushu'un tsa wu ubata wa Asula a da wo utusa shi. Icu'un i ndolo ili yu uvadi i da, babu akiza, waru Mekerencesu† ma da ma tsu tawa ne ele.

<sup>16</sup> Ubata u na icigi ya aci na tsushu'un tsa ri suru, ubata u ndolo ujambu u da u tsu dana lo waru iwuya suru i ta lo.

<sup>17</sup> Amma ugbozu u na wu utai de zuwa suru u ta cece. U ciga ta asuvu nden. Mantsa suru ben da u tsu dana, waru u tsu zuwaa ta ama atsuvu. U ta

ni isa'ani, waru u tsu yuwan ta linga sa'ani. U tsu roco mayan me ili koko'o shi, waru u tsu yuwan ili ni ikpa'a shi.

<sup>18</sup> Aza a na aa casu ama adanshi a asuvu nden a tsu cu'wan ta icu'un ya asuvu nden, reve a gasa isa'ani.

## 4

### *I ca aciyadu e ekere a Asula*

<sup>1</sup> Nye i da gba yaa tawusa na mawasan na nlangi atsuma a du? Ili i na yaa tawusa na addama a nda suru ele da ili i na i cigai, a na a ri a nlangi atsuma a du.

<sup>2</sup> I ciga ta ili i na i ri na ayi shi, avu i yuwan ifobi avu yu una tsara i tsura ili i ndolo. I ta yuwusan tsushu'un tsi ili i na ozo o ro a ri na ayi, waru yaa tsura ili i ndolo adama a aciyadu shi, ayi da i zuwai yaa yuwusan mawasan na nlangi adama i usa le e ekere a aza a na a ri ni i da. Suru na ne, ili i na i zuwai i tsurai ili i na i cigai shi, ayi da, i pati Asula shi.

<sup>3</sup> Waru ko ni i pati, i tsu tsura shi adama a na no okolo a sa'ani a da i yuwayin ipati'i shi, i ciga ta ili i na yoo yo'onoto du okolo.

<sup>4</sup> Adu aza o ulambu wa abula! I reve, ni i ciga ili yu uvadi i nda, i to o'wo n'yuwatan ma Asula.

<sup>5</sup> Ko i ta majiyan pere da Adanshi a Asula a dammai, Ruhu va yi ta pe atsuma a tsu waru u ta a tsushu'un lon.

<sup>6</sup> U tsu roco tsu ta isa'ani ya yi na abunda. Ayi da i zuwai adanshi a yi a dammai:

“Asula a 'yuwan ta za na a 'yasasan aciyayi,

amma u tsu yuwaan t̄a za na votoyin aciyayi ub̄ata w̄a yi isa'ani.”

<sup>7</sup> Adama o ndolo, i ca aciyadu e ekere a Asula. I 'yuwan Mekerencesu, u ta suma u lyawa du.

<sup>8</sup> I tawa zuzu na Asula, ayi waru u ta tawa zuzu na adu. Adu aza o unusu, yi za'wa ekere a du, reve i zuwa okolo a du o o'wo cece. Adama a na i ri no okolo e re re.

<sup>9</sup> I yuwan atsumolangu, i shon, i yuwan abara adama e ili yu uwuyan u na i yuwain. I lyawa izo'oshi i du i kamba atsumolangu, mazanga waru ma kamba mesun ma abunda.

<sup>10</sup> I voton aciyadu e ekere a Asulazuva, ayi waru u ta 'yasana du.

<sup>11</sup> Ama a va, she i yuwusan adanshi a vanvama a tyo e ekere a aza a du wan. Nna vu yuwan adanshi o unusu a na za va wu vi itoni yuwain, avu waru vu tawaa yi na addama, vu te ge'etosu Wila wa Asula. Agba waru avu za vu uge'etosu da shi, za na aa gura reve Wila'a u ta mejege ko u ri mejege shi. Ulinga wa wu ayi da vu yuwan tsutoni na ayi.

<sup>12</sup> Asula a da a yuwain Wila, ayi da waru a nde'en na waa gura yuwan uge'etosu atsuma a tsu mejege. Ayi da waru a nde'en u ri nu ucira u na waa lungusa ko u wawa. Adama o ndolo, avu zane da a na vee ge'eto za va wu?

### *Yaa gura reve nfa'an shi*

<sup>13</sup> I kambuwa ugbozu e ili i nda, i ta dansa, “Ana'an ko nfa'an tsu ta 'yawa a lyuci ndede, tsu yuwan de aa'wan a ta a tsulusa na tsu wini a tsurusa ikebe i na yaa uwusa tsu.”

<sup>14</sup> I damma t̄a tsunda, agba i reve ili i na yaa fara nfa'an shi. Adama a na wuma u ɗu u t̄a vadamma megeve. U tsu ɗana t̄a pa nda gogo a mantsa me ke'en u kara.

<sup>15</sup> Adama o ndolo, u to lobono i damma, “Nna Asulazuva a ciga tsu ɗana wuma, aɗu tsu yuwan ili i nda ne ele ndede.”

<sup>16</sup> Ko na wo o'woi, i ɗana t̄a a yuwusan adanshi e ili i na yaa yuwan nfa'an nu uvaɗu adama a na i tarai aciyaɗu ili i ro. Cu'un vu uvaɗu u ndolo biti iwuya i ɗa.

<sup>17</sup> I cuwan, unusu u ɗa na vuma reve ili i na i lobonoi u yuwan, reve u 'yuwan a yuwan i ɗa.

## 5

### *O rono t̄a aza o utsuru atsuvu*

<sup>1</sup> Aza o utsuru, zuwai atsuvu a ɗu. I t̄a shon na yisaali adama a atsumalima a na a ri lo a tawa ɗu.

<sup>2</sup> Utsuru u ɗu u ta shama, waru aran a ta tama itana i sa'ani yi ikebe i ɗu.

<sup>3</sup> Gogo zinariya na azurufa oo o'wo ili shi. Ili yi ikebe i na i zuwayi ucira, a t̄a lungusa lipu ɗu atsuma a akina. † Ili yi ikebe i na i bolotoi nda suru, e te isawan a makakan ma ɗu o unā wi ili i na i yuwain o urana wu uge'etosu. Aɗu ɗa nda gba i bolotoi utsuru u ɗu a rana vu ukosu u nda.

<sup>4</sup> Zuwai atsuvu a ɗu gogo! Yu uwwa mesun ma aza a zamalinga aza a na i 'yuwain a tsupa. I 'yuwan t̄a a tsupa melen me le, ikebe i ɗaɗa n nda a yuwusan adanshi a aci a ɗu. Asulazuva a uwwa t̄a mesun ma aza a zamalinga'a.

<sup>5</sup> I ɗanu t̄a atsuma o uvaɗi babu linga, na ne suru yu uwwa t̄a uyo'o u na i cigai. I yuwan t̄a waru

mgbain gogo i fobo ta aciyađu adama o urana u mapada.

<sup>6</sup> I yuwaan ta ama a sa'ani uge'etosu wu uwuyan, reve i kambato le aza o unusu, reve yu una le, agba a yuwaan du ili i ro shi.

### *Iyuan ankuri na atsumalima*

<sup>7</sup> Aza a va, i yuan ankuri ana wo o'woi i ta pura ukambu wu Zagbain. I jiyana aza a na a tsu yuwusan cimba, aza a na o tsu puro mini mo ujuvu, waru a tsu yuwan ta ankuri hali mantsa mo ugasa. I cuwan cine a tsu yuwan ankuri, reve o puro itana yu ufuma i kutsa ulobonu.

<sup>8</sup> Ne da fo yaa yuwaan ankuri. I gbama asuvu adama a na Zagbain ta lo a tawa gogo.

<sup>9</sup> Aza a va, she i yuwan adanshawuya e ekere aza a du wan. Na ne da shi Asula e te ge'eto du. I kalyuwa ulobonu! Za vu uge'etosu u gbain u ta lo a tawa. U ta lo mishin o unantsu!

<sup>10</sup> Aza a va, i kalyuwa ama a Asula aza a na a yuwusan adanshi o una wa yi atsuma o ucira wa ala a yi. Ele da iroci ya ama a na yaa kalyuwa adama o mosowo ma atsumalima.

<sup>11</sup> Tsu tsu ca ta aza a na a yuwain ankuri atsuma a atsumalima tsugbain. Ayuba iroci i vuma na kabai asuvu na ankuri da lon. Atsuma e ili i na i cina niyi, tse ene ta ifobi ya Asulazuva cine u kosoi ulobonu a wuma wa yi, adama a na Asulazuva a ta tapu ni isa'ani nu urocusu wi iliyali.

<sup>12</sup> Aza a va, u ta dana ulobonu lon she i kucina na zuva wan. She i yuwan ne avu i de ida ko ili i ro wan. Ili i na yi ntsayi i yuwan ayi da i damma "ee"

ko “o'o” goon. Ni i yuwan ne yaa nusan shi, waru oo kototo ɗu shi.

*Uritosu adama a avasa*

<sup>13</sup> Atsuma a ɗu za ro ta pe na atsumalima? Vuma ndolo lyuwa elime na avasa. Nanza atsuma a ɗu u ta na mazanga? Vuma ndolo cana ishipe yi ica.

<sup>14</sup> Atsuma a ɗu nanza ta pe nu ubanakun? Vuma ndolo banu azagbainɗa a aza e Itoni tsara a yuwaan yi avasa. A ta tsuwaan yi mani'in atsuma a ala a Zagbain.

<sup>15</sup> Avasa a na azagbain a yuwain no okolo a ta, avasa o ndolo a ta kambato za vu ubanakun u ndolo gbaga. Asula a ta kambato yi gbaga. Waru nu u yuwan unusu suru, Asula a ta yuwaan yi gafura.

<sup>16</sup> Adama o ndolo, i dammulai unusu u ɗu, reve i yuwunlayi avasa tsara Asula a kambato ɗu gbaga. Vuma na Asula a uwwusa uyo'o wa yi, avasa a yi a ta nu ucira waru u tsu tawa a ta ni isa'ani.

<sup>17</sup> Iliyaɗ vuma ɗa oroci a tsu. U yuwan ta avasa na amayun she o ro'o wan, waru o ro'o e ida shi, hali a'wan a ta'atsu na akapi.

<sup>18</sup> Reve u yuwisan avasa, reve Asula a yuwan iro'i, ɗaɗa ida i matsain itana yu una ulobonu.◇

<sup>19</sup> Aza a va, na za ro puwaan atsuma o ure wa amayun, za ro atsuma a ɗu u 'yawa u kambato vuma ndolo.

<sup>20</sup> I cuwan ulobonu, vuma na kambato za vu unusu na riyai, vuma ndolo ta wawa za vu unusu'u diga o ukwa, adama o ndolo Asula a ta yuwaan vuma ndolo gafura vu nusu va abunda na u yuwain.

---

◇ 5:18 1 Ngo. 18:41-46.

**Nzuwulai n Sa'avu na Tsishingini na adiva a  
na a dangulai a Nzuwulai mu Ufaru  
New Testament in Tsishingini (NI:tsw:Tsishingini)**

copyright © 2011 Wycliffe Bible Translators, Inc.

Language: Tsishingini

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Tsishingini

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 18 Apr 2025 from source files  
dated 29 Jan 2022

bb185c63-dc44-572c-ae93-66252c4dfa1e